

“Loenghyahvaiz” Sihlinz:

Gaiq Dijbauj Yisuz Ndawbiengz Ciuhgeq Bouxcuengh

西林“龙涯外”：壮族古老民间艺术珍品

□ Cinz Cwngz



▲ Doq “loenghyahvaiz”
doq dwkgienzfaex.

▲ Heiq dajcae dawzrauq
“loenghyahvaiz”.

◀ Moix baez yienjheiq vunzmbanj cungj humx yawj.



▲ Gyaeujvaiz ndaemndwt
caen vifung.



▲ Ngoenzciet caemh naengh
gwn donq ngaiz.



▲ Haenqhwd doxhoenx hen
vaizvuengz.



▲ Heiq gueng vaiz gyaез
vaiz ndaw “loenghyahvaiz”.



▲ Vunzmbanj caez diuq
foux “loenghyahvaiz”.



“Loenghyahvaiz” ciengz-
mienh yinxvunz.

“Fouxvaizcin Bouxcuengh” Sihlinz Yen gaenq riuzcienz baenz 350 lai bi, biujdap cungj yiengh ciuhnduj sohsed ndeu, haenhdanq gij ndei duzvaiz caeuq bouxvunz guhbuenx doxhuz caemhyouq, gaenxmaenx guhhong haenx, mbaenjgouz saenzvaiz hawj vunzraeuz daiq daeuj gitndei hab' ei; yienj ndaej ndujndet cocat, daiq miz yiengh ciuhnduj, miz gij daegsaek minzcuз diegde caeuq ndawcomz lai yiengh, ndaej lauxhangz canghmaeq heuhguh “gaiq bienqrin lix” yisuz vwnzva ndawbiengz Sihlinz, dwg gaiq dijbauj yisuz ndawbiengz ciuhgeq Bouxcuengh raen mbouj lai ndeu, bi 2006 ndaej lied haeuj buек daih' it swegih gaep feihvuzciz vwnzva yizcanj baujhoh mingzloeg.

“Loenghyahvaiz” eiқsei dwg “diuqfoux loenghфoux gyaeujvaiz”, youh miz gij eiқsei “diuq fouxvaizmeh”. Cungj foux neix dwg youq ndwencieng caeuq seiz ndaemcin guh hozdung caeqbaiq seiz diuq, ndigah youh heuhguh “fouxvaizcin”. “Loenghyahvaiz” seiz ciuhgeq youq gij mbanj Bouxcuengh ranghdieg baihsae Guengjsae, baihnanz Yinznanz daengj riuzcienz, seizneix cijdan Sihlinz Yen Nazcoj Myauzczuз Yangh Babwnz Cunh Mbanjdohbwnz riuzcienz roengzdaeuj, mbanj neiyungz gaenq saetcienz. Hozdung “loenghyahvaiz” itbuen daj ndwencieng cocaet hainduj daengz ndwensam cosam guhsat, faen sam duenh bae

guh: It dwg caeqbaiq saenzvaiz, coux saenzvaiz; ngeih dwg diuqfoux yienjheiq; sam dwg soengq saenzvaiz. Gij yizsi coux soengq saenzvaiz guh ndaej gig hoengh, faenbied youq banhaet caeuq banringzgvaq guh; gij biujyienj wnq cix youq doengxhaemh guh, miz foux gyaeujvaiz, dwkgienz, eufwen daengj.

“Gyaeujvaiz” “loenghyahvaiz” dwg au dukfaexcuk san baenz yiengh gyaeujvaiz le caiq nem caengz cejsa ndeu hwnjbae, daz saek ndaem veh ok cehdavaiz, ndang vaiz dwg au baengzndaem roxnaeuz baengzmong longz, yawj hwnjbae yiengh rongh-lwenq miz daegsaek. Mwh biujyienj, cawz gyaeujvaiz le, lij miz mauhngeg, cax, faggiemq, faexmbaenq, fagca, fagcuiz doenghgij doxgaiq yunghdawz neix, yozgi miz laz, gyong, nauzczemq, loxlez, ngeihyienz, aendig, hauhgauvaiz daengj guhbuenx dem, ca mbouj geijlai yungh caenh gij doxgaiq diuqfoux yienjheiq ndawbiengz riuzcienz youq ranghdieg Guekgaeunding ciuhgeq haenx.

Moix bi ndwencieng cocaet, vunzmbanj youq goenglauх ndaw mbanj daiqlingx lajde roq gyong roq laz, diuq fouxgyaeujvaiz, doxcae hae daengz Gamjokraemx caeqbaiq cingj saenzvaiz dauqma ndaw mbanj caeuq vunzlai gvaq ciet caemh angq. Vunzlai dauqma daengz gizdieg guh hozdung ndaw mbanj, biujyienj couh hainduj lo, youq ndaw sing gyonglaz, loxlez haenx, boux foux gyaeujvaiz

fwnz yaengx gyaeujvaiz daep youq gwnz gyaeuj, ndang longz baengzvaiz, diuqyekyek foux haeuj ndaw cungq-gyang, yiengq vunzlai hengzlaex, guh ok buetbongh, diuqsaet, linx rix lwg, haeujninz, rag cae, doznaek, doxdaemj daengj gij yiengh doenghyeb haenx; riengzlaeng couh miz boux langhvaiz daep mauhngeg byaij ok-daeuj, caeuq vaizvuengz itheij fouxdoengh, hensouj vaizvuengz; ciepdwk miz gak cungj gaem doxgaiq dwkgienz biujyienj youq seiqhenz vaizvuengz, bouxlanghvaiz yienj hwnjdaeuj, vunz buenx vaiz foux, roxnaeuz faen cuj doxhoenx biujyienj, guh gij yiengh hoenxmoeb duzvaiz caeuq henzsouj duzvaiz hoenxding haenx, eiқsei dwg caeuq duzgvaiz duzfangz, guk beuq manaez doxhoenx daengj. Gak cungj biujyienj doengzcaez bae guh, caemh ndaej dandog bae guh. Youq ndaw gyang diuqfoux dwkgienz yietnaiq seizgan, canghfwen couh eu fwen doiq fwen hwnjdaeuj. Gij fwen heuhguh “fwen bouxnoengz”, dwg caen hoz caen sing euciengq, sing seuqsat goksad, ndei dingq dangqmaz; gij neiyungz fwen gig lai, miz haenhdanq goengcoj Baeuqroxdoh, miz haenhdanq duzvaiz gaenxhong dwgengz, maqmuengh rumz swnh fwn yinz, bouxvunz doenghduz bingzan, haeuxgwn fungsou, caemh miz euciengq guhhong gvaq saedceij, ranznden doxhuz, vunzmbanj doxgiet, aeueiq vunzlaux gyaез lwgnding, doiq fwenyoux daengj lai cungj lai yiengh.

Gij biujyienj “loenghyahvaiz” neiyungz bauhamz fungsug caeqbaiq, diuqfoux, yaem'wenq, dwkgienz, fwen daengj, bauhamz le fungcingz fungsug minzcuз, yisuz ndawbiengz daengj haujlai yenzsu minzcuз, ndawcomz lai cungj lai yiengh. Riengzdwk seizdaih hwngfat, “loenghyahvaiz” gaenq demgya le haujlai neiyungz moq, engq ndei bae haenhdanq sevei moq, saedceij moq.